

Piginneqqaartussaannermik inatsisip Kalaallit Nunaannut atortuulersinneqarnissaaanik peqqussutip naalisarnera

Kalaallit Nunaanni Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmiit noqqaasoqarneratigut Kulturministeriaqarfik piginneqqaartussaannermik inatsisip Kalaallit Nunaannut atortuulersinneqarnissaaanik peqqussutissamut missingersuusiorsimavoq.

Piginneqqaartussaannermik inatsimmi § 93 malillugu piginneqqaartussaannermut inatsit Kalaallit Nunaannut atuutinngilaq, kisiannili kunngip peqqussutaatigut Kalaallit Nunaanni immikkut pissutsit naapertorlugit allaassuteqartillugu tamakkiisumik ilaannakuusumilluunniit atulersinneqarsinnaalluni. Kalaallit Nunaanni piginneqqaartussaannermut tunngasut maannakkut piginneqqaartussaannermik inatsisikkut inatsimmik nalunaarut nr. 710, 30. juni 2004-imeersukkut malittarisassaqaartinneqarput. Inatsit peqqussut nr. 561, 7. juni 2006-imeersukkut Kalaallit Nunaannut atuutilersinneqarsimavoq.

Peqqussutissamut missingersuutikkut piginneqqaartussaannermut inatsit kalaallit nunaanni immikkut pissutsit naapertorlugit allaassuteqartillugu inatsimmik nalunaarut nr. 1144, 23. oktober 2014-imeersukkut Kalaallit Nunaannut atuutilersinneqarpoq.

Ataaniittumi piginneqqaartussaannermut inatsimmut inatsisit allannguutit, Kalaallit Nunaannut atulersinneqartut taaneqarput, soorlu aamma Kalaallit Nunaanni maannakkut inatsisikkut inissisimanernut naleqqiullugu annertuunik allannguisoqartoq:

Inatsit nr. 1440, 22. december 2004-imeersoq

- §§ 16-16 b – Toqqorsiviit, atuakkanik atorniartarfiit katersugaasiviillu pillugit piginneqqaartussaannekkut malittarisassat pisariinnerulernissaat siunnersuutigineqarpoq.
- Tunniussinissamut pisussaaffik pillugu inatsit aamma katersugaasiviit pillugit inatsit Kalaallit Nunaannut atuutinngillat. Siunnersuutigineqarpoq §§ 16-16 b Kalaallit Nunaannut atulersinneqassasut, aalajangersakkat Kalaallit Nunaanni pissutsinut naleqqussarneqassasut. Tamanna aamma isumaqarpoq § 11, imm. 3, oqaaseqatigiit aappaat, tunniussinissamut pisussaaffik pillugu inatsit tunuliaqutaralugu ikkunneqarsimasoq atulersinneqarnani, aamma § 33, tunniussinissamut pisussaaffik pillugu inatsimmut innersuussilluni piginneqqaartussaannermut inatsimmi atorunnaarsinneqartoq, atorunnaarsinneqarnani.

Inatsit nr. 231, 8. april 2008-imeersoq (Piginneqqaartussaannermik tunniussineq, kulturikkut kingornussanik il.il. digitalinngorsaaneq)

- § 13, imm. 5, § 14, imm. 2, § 16 b, imm. 2, § 18, imm. 1, § 30, imm. 6, § 68, imm. 2, § 68, imm. 4 – Aalajangersakkanut ataasiakkaanut

ilanngunneqarpoq isumaqatigiissutip isumaqatigiissutigineqarnissaanut piunasaqaatit naammaginngitsut imaluunniit akissarsiat annertussusaat pillugit apeqqutit eqqartuussivinnut suliaassanngortinneqarsinnaasut.

- § 24 a – Eqqumiitsuliatut suliat tamanut saqqummiussat assilineqarnissaannut licensimik isumaqatigiissut eqqunneqarpoq.
- § 30 a – Piffissaq eqqarsaatigalugu suliat tamanut saqqummiunneqarsimasut aalajangersimasut ilaatigut aallakaateqqinneqarnissaannut periarfissaq annertusineqarpoq, taamaalilluni aalajangersagaq sulianut tunisassiornermut ilaasunut, 1. januar 2007 sioqqullugu aallakaatinneqarsimasunut atuutilerluni.
- § 50 – Immikkoortunut nutaanut licensimik isumaqatigiissuteqarnissamut nalinginnaasumik tunngavik eqqunneqarpoq, pisinnaatitaasut atuisullu tamanna pisariaqartippassuk tamanna pillugu isumaqatigiissuteqarsinnaallutik. Licensimik nalinginnaasumik isumaqatigiissut maannakkut aalajangersimasumik licensimik isumaqatigiissutinik tapertatut isigineqassaaq taamaalillunilu immikkoortuni nutaarluinnarni atorineqarsinnaalluni imaluunniit licensimik isumaqatigiissutini aalajangersakkanut atuutereersunut tapertaasinnaallutik.
- §§ 51 aamma 54 nutaamik oqaasertalerneqarput.
- § 47 Piginneqqaartussaannermut ataatsimiititaliaq pillugu Kalaallit Nunaannut atulersinneqanngilaq. § 47 malillugu Piginneqqaartussaannermut ataatsimiititaliap aalajangiinissamut piginnaatitaanerat aalajangersakkat ataasiakkaat malillugit eqqartuussivinniippoq.

Inatsit nr. 380, 17. april 2013-imeersoq (Eqqumiitsuliortunut nipinillu immiussisunut piffissap illersuiffiusup sivitsorneqarnera, eqqumiitsuliortut pisinnaatitaaffinnik tunniussineq pillugu isumaqatigiissutip atorunnaarsinnera, eqqumiitsuliortut ukiukkaartumik tapertaasumik akissarsiaqarsinnaanerat il.il.)

- §§ 63, 65 aamma 66 – Piffissaq illersuiffiusoq siunnersuutigineqarpoq eqqumiitsuliortunut nipinillu immiussisartunut il.il. sivitsorneqassasoq.
- § 66 a – Siunnersuut eqqumiitsuliortut pisinnaatitaaffinnik tunniussineq pillugu isumaqatigiissutinik atorunnaarsitsinissamut pisinnaatitsivoq, pisinnaatitaaffiit tunniunneqarsimasut naammattumik atorineqarsimangippata.
- § 66 b – Piffissap illersuiffiusup sivitsorneqarnerata malitsigisaanik inatsisissatut siunnersuut piffissami illersuiffiusumi sivitsorneqartumi ukiukkaartumik tapertaasumik akissarsiaqarnissamut eqqumiitsuliortut pisinnaatitaaffeqarnerat pillugu aalajangersakkanik nutaanik imaqarpoq.
- § 66 c – aalajangersakkap kinguneraa eqqumiitsuliortup nipinik immiussisumut pisinnaatitaaffini tunniussimappagu ingerlaavartumillu akissarsiaqarsinnaatitaaneq pillugu isumaqatigiittoqarsimappat,

siumoortumik akiliisarnerit imaluunniit isumaqatigiissutigut ilanngaatineqartartut eqqumiitsuliortup tiginissaanut piunasaqaataanit akiliutigineqartunit ilanngaatineqassanngillat. Taamaalilluni piffissap illersuiffiusup sivitsorneqarnera eqqumiitsuliortunit tamakkiisumik iluaqutigineqarnissaa qulakkeerneqarpoq.

Inatsit nr. 741, 25. juni 2014-imeersoq (Suliat angajoqqaanngitsut aalajangersimasut atorineqarnissaasa akuerineqarneri aamma kabel-ikkut siaruarternermut tunngasunik licensimi isumaqatigiissummi aalajangersakkap allanngortinnera)

- § 35, imm. 4-7 – Kabel-imik siaruarternineq pillugu licensimik isumaqatigiissummi aalajangersakkat eqqunneqarneri. Siunnersuummi siunertarineqarpoq licensimik isumaqatigiissummi § 35-imi ataatsikkoortumik allannguuteqanngitsumillu kabel-ikkut atortut aqqutigalugit atortutigullu allatigut radiukkut isiginnaarutikkullu aallakaatitat atassuteqanngitsumik aallakaatinneqartut radiukkut isiginnaarutikkullu aallakaatitat siaruarteqqinneqarnissaat teknologiikkut ineriartornermut isumaqatigiissutinillu ilaanngitsut piunasaqarlutik atuinissaannut periarfissanut nutaanut naleqqussarneqarluni.

Inatsit nr. 719, 8. juni 2018-imeersoq (Marrakesh-imi il.il. peqqussutip naammassineqarnera)

- § 17 – Peqqussutip maannakkut § 17-imi qulequtaa ”*Isigisaqarnikkut tusaasaqarnikkullu innarluutillit atugassaannik assilisanik piliorneq*” imatut allanngortinneqarpoq ”*Inuit isigisaqarnikkut, tusaasaqarnikkut, atuarsinnaanikkullu innarluutillit il.il.*” Aalajangersakkami aalajangersimasunik allannguisoqarpoq, ilaatigut § 17, imm. 3 peerneqarpoq, aamma peqqussutip sinnerani tamatuma kingunerisaanik allannguisoqarluni.
- §§ 17 a -17 e ilanngunneqarput Kalaallit Nunaanni pissutsit tunngavigalugit allannguuteqartillugit. Malittarisassani piginneqqaartussaataasut kisermaassisuunissaat ilanngunneqarpoq, taamaalilluni atuakkanik allanillu naqitanik innarluutilinnut naleqquttunik sanasoqarsinnaalerluni, tassunga ilanngullugit e-atuakkat atuffassissutillu nipillit, isiginiarnikkut atuarsinnaanikkullu innarluuteqartunut atugassat.